



AIS KRIM KAM LONG PLES PINIS

wanpela Hailans meri long Goroka So long yia 1974 i traim namba wan taim ais krim.

David Williams, papa bilong 'Liklik Buk', em i potoim dispela meri.



LUKIM INSAIT :

Tingting Bung.....	3
Bisnis Pamuk.....	3
Pas i Kam.....	4
Nius Long Meri.....	5
Toktoktok.....	7
32 Kain Pisin Lus.....	8
Ples Hait Bilong	
Abus Long Bus.....	9
Wok Plisman.....	12
Stori Tumbuna.....	13
Moa Pas.....	15
Fantom.....	18
Pikinini Mas	
Kisim Sut.....	20




Poto long lephan i soim Asbisop Leo Arkfeld bilong Madang wantaim Pater John Noss long taim asbisop i givim sakramen bilong konfimesen long lain yangpela meri long ples Mirap, i no longwe long Madang. Long dispela hap ol yangpela boi na meri i save pasim purpur na mal long kain seremoni olsem.

Poto i soim lain saveman bilong olgeta dipatmen bilong gavman i wok nau long kisim olkain spesel trening na kos long Port Moresby Pablik Sevis Trening Koles. Dispela bai go inap 6-pela wik olgeta.

As tingting bilong dispela kos em i bilong mekim go het gut tru ol pasin bilong ol hetman na lida insait long olgeta dipatmen bilong gavman. Na tu ol i mas skul long helpim ol wokman bilong ol long mekimi gutpela wok.

Em hia nem bilong ol i insait long dispela kos: Alphonse Aitsi (Plis Dipatmen), Oliver Amba (Koles bilong trenim ol pailot), Daniel Abaneta (Bisnis Developmen), Andrew Emang (Dipatmen ov Helt), Arthur Gaso (Dipatmen bilong bosim ol Provins), Ernest Hore Popondetta Egrikalsa Koles), Gabriel Ikupu (Dipatmen bilong Leba), Jacol Kairi (Dipatmen bilong Transpot), James Koimo (Hailans Egrikalsa Koles), Kalei Makura (Kastam Dipatmen), Paul Opu (Pablik Sevis Komisn), Pisou Popen (Vudal Egrikalsa Koles), Nawali Saki (Ofis bilong Bisnis Developmen), Damien Sarwabe (Yunivesiti bilong PNG), Kevin Tsikula (Arawa Skul ov Nesing), Andrew Tuka (Dipatmen bilong Helt), Frank Willy (Sevings na Lon Sosaiti).





PASIN BILONG TINGTING BUNG

Bipo, bipo, strongpela we bilong ranim ples em long olgeta pipel i tingting bung.

Long taim bilong mekim bikpela kaikai o mekim kibung, i mas gat planti man i sindaun na givim tingting.

Dispela i bin mekim kamap gutpela pasin, we wanpela man i tingting long narapela man. Brata i tingim brata na i helpim em long kaikai o mekim haus bilong em.

Dispela i bin helpim ol pipel long no mekim laik nogut bilong ol yet. Em i strongim ples na sindaun bilong yumi. Na i no bin gat hangre.

Nau planti kain kain tingting i kam long ausait na i paulim yumi.

Wanpela long dispela, em long wan wan tingting, o wanpela man i ting long em yet. Long guttaim ol i bin kolim dispela kain tingting long "wau long en". Dispela kain tingting i bringim pasin nogut i kam long kantri bilong yumi.

Ol yang pipel i go long bikpela skul i kisim dispela pasin. Kain tingting hia i mekim ol i tingting long ol yet bai i no tingting moa long ol lapun mama na papa long ples.

Sapos yumi larim dispela kain tingting i winim planti pipel, bai pasin bilong bipo, we pikinini i lukautim lapun papamama bai pinis. Na bai yumi kisim dispela nupela pasin i kam long ausait, we i mas gat "insurance company" na "old age pension". Em nau, bai tingting marimari long ol lapun bai pinis. Na olgeta samting i kamap bisnis tasol. Olsem na bai tingting bilong mani bai go pas.

Long dispela nau, bai yumi pipel bilong Papua Niugini i kamap kalabusman bilong ol bikpela kampani bilong Englan, Australia, na Amerika na ol arapela kantri. Kantri bilong yumi bai samting nating. Yumi bai samting nating.

Em nau yumi mas askim yumi yet: bai yumi bihainim rot bilong yumi yet, em long tingting bung? O bai yumi bihainim rot bilong wan wan tingting?

Tingting bung bai bringim trupela gavman long yumi. Tingting wan wan bai bringim gavman nogut, we wanpela man i kisim olgeta pawa long han bilong em na i tokim ol pipel long bihainim laik bilong em tasol.

Kumalau Tawali

BISNIS PAMUK I GUTPELA SAMTING

Ol hetman bilong Melanesian Kaunsil bilong Ol Sios - em grup ofisa i tokman bilong 1,750,000 Kristen insait long Papua Niugini - i bin tokaut strong egens long aidia bilong mekim pasin pamuk i kamap olsem wanpela bisnis.

Ol Katolik na Luteran na Yunaitet Sios na Engliken na Selvesen Ami i kalap nogut long harim dispela aidia bilong Is Nu Briten Provinsal Gavman. Mista John Tovue na sampela arapela stiaman bilong dispela provins i bin tok: pasin pamuk em i gutpela wok long helpim ol yangpela meri i stap long hap bilong Gazelle na i no gat mani. Na dispela pasin tu bai helpim ol long sanap long lek bilong ol yet. Ol man i tok olsem.

Tasol ol hetman bilong Melanesian Kaunsil bilong ol Sios i bekim tok: Dispela pasin bilong baim bodi bilong meri - em i daunim tru na semim tru ol meri. Na sapos tingting skrap long winim mani tasol i karamapim olgeta arapela tingting na olgeta gutpela pasin na lo bilong God - orait yumi bagarap olgeta. Yumi lus tru tru.

Sapos provinsal gavman i wari long planti trabel i save kamap long taun bikos i no gat inap wok, orait watpo ol i no tingting moa long mekim go het wok fama ausait long taun - bai ol manmeri i no mas kam insait long taun tasol long painim wok? Tasol aidia bilong tok orait long pasin pamuk, em i longlong samting tru. Sapos dispela kain tingting i win, orait neks taim bai ol man ya i mas

tok orait tu long pasin stil na pasin bilong bagarapim na kilim na kilim ol arapela pipel. Long wanem dispela tupela samting i bikpela wari tu long ol taun.

Ol ofisa bilong Melanesian Kaunsil bilong ol sios i singaut long olgeta grup i laik helpim ol meri na sambai long ol, nau ol i mas tokaut strong na sanap tru na helpim ol meri. Na ol pipel i save toktok planti long helpim ol manmeri i sindaun gut na mekim pasin bilong ol i go het - nau ol i mas sanap na toktok, na i no pasim maus bilong ol. Oltaim ol i bin tok egens long wanpela man i no ken krungutim narapela man - orait, nau ol i ken lukim ol i man i gat wanem tingting na plen bilong krungutim tru ol meri.

Ol ofisa bilong Melanesian Kaunsil bilong ol Sios i tok: Mipela i sem long lukim wanpela Provinsal Gavman i no inap painim narapela we bilong helpim ol yangpela pipel bilong em i laik painim wok - na i laik ol i mekim wok pamuk long winim mani.

Watpo ol i no ken ting long dispela nesenel yut sevis, em planti arapela man i bin toktok long en? Dispela kain pasin pamuk bai helpim go het bilong kantri olsem wanem?

Ol tumbuna pikinini bilong mipela bai ting na tok wanem long dispela lain papamama bilong ol, i bin kirapim wanpela rabis pasin olsem tude? Na sampele stiaman bilong dispela Provinsal Gavman i tok, wok pamuk i mekim yangpela meri i sanap long lek bilong em yet; em bai selp relayan. Tru a??? Em i no selp relayan. Em i hangmap long bodi bilong ol man i lus tru long sempasin, na long ol dispela kain man i no save wari o tingting liklik long meri pamuk.

Sapos yumi laik bihainim tru pasin na tingting bilong ol tumbuna, yumi mas egens long bisnis pamuk.

Wanpela loman namel long ol het ofisa bilong Melanesian Kaunsil bilong ol Sios, em Mista Bernard Narakobi, siaman tu bilong komisin bilong lo, em i tok olsem: Komisin bilong mi bai glasim gut dispela aidia bilong bisnis pamuk. Na mipela bai tingting planti long ol pasin nogut i save kamap long en. Na mipela bai tingting tu long em i egens long lo bilong God na bilong ol tumbuna. Na bihain mipela bai givim ripot bilong mipela na tingting bilong mipela long dispela samting: bisnis pamuk em i gutpela samting long dispela kantri o nogat.

Wanem papa tru i laikim naispela pikinini meri bilong em i kamap pamuk ?



PAS I KAM LONG OL PIPEL

ASUA BILONG HUSAT

Dia Edita - Olsem wanem na nau long dispela taim planti Katolik pipel i no gat moa interes long kam long lotu long Sande o ol bikpela fis de?

Na olsem wanem tu long ol planti yangpela pipel i save spak na kam long lotu o kam na i stap ausait long haus lotu na mekim planti nois. Em long ol bikpela de olsem Ista na Krismas. Yu ken lukim planti bikhet pasin tru i save kamap. Dispela ol pasin i save kamap long ol Katolik peris ausait long ol taun.

Mi laik save husat tru i as bilong ol dispela bikhet pasin na planti i no gat moa laik long kam long lotu. Ol Misineri o ol pipel yet.

Mi bin toktok pinis wantaim planti bilong ol dispela ol pipel na tok bekim ol i save givim mi olsem. "Ol-pela we bilong lotu i save givim moa long ol pipel i bilip strong long lotu bilong ol. Tasol nau long ol senis i bin kamap insait long lotu i bin soim olsem lotu i samting nating.

Kristen i bin kam insait long kantri na long soim ol pipel olsem lotu bilong yu i trupela sios. Orait, i no ken traim senisim lotu i go insait long pasin bilong kantri. Long wanem insait long kantri ol pipel i bilip long ol planti kain gutpela masalai na masalai nogut. Na olkain senis olsem i no givim ol strongpela bilip long trupela masalai (God), em ol misineri i bin bringim tok bilong em.

Yu luk bek long yia bipo long 1970 o 71, taim i no gat ol senis yet, Man, ol haus lotu i save pulap long ol pipel olgeta Sande. No gat bikhet pasin olsem nau i save kamap.

Nau long dispela taim yu lukim ol pipel i no gat bilip tru long lotu bilong ol. Ol yangpela pipel na meri i go long lotu long Sande bilong putim skin long ol meri na man tasol. Na planti ol bikpela o ol-

pela man na meri i stap long ples i no gat laik long kam long lotu.

Planti yangpela pipel nau i no gat moa laik long marit insait long Kristen pasin.

Nating long sampela yia bai i kam bai planti ol misineri i painim trabel insait long ol wantaim ol kristen bilong em.

I gutpela sapos bihain sampela senis i laik kam insait long lotu, orait painimaut tingting bilong ol yangpela pipel pastaim. Long wanem ol dispela pipel bai holim kantri na ol olupela pipel bai i dai isi isi.

Mi ting yumi mas putim hevi long ol dispela ol lain pipel i bin bung na mekim ol senis na i no long ol pipel em ol i save bikhet long lotu.

Laz. Z. Smith,
Banara/Madang.

Dia Edita - Mi laik bekim ol askim bilong man hia i bilong BANARA. Long hap bilong Bogia, Madang.

Orait, nau mi laik bekim namba wan askim bilong yu; Yes, yu tok asua bilong husat? Mi ting olsem: Asua bilong ol pipel yet. Ol i lukim liklik senis bilong lotu i kamap na ol i les long go long lotu. Maski, larim ol. Isi, isi long ol. Bambang ol i kam. Yu save Jisas i tok wanem? Maski, wan o tu man i bung long Nem bilong mi, mi i stap wantaim ol. Em tasol.

Namba tu askim bilong yu i go long ol yangpela man, i save spak na bagarapim lotu long ol de olsem krismas na ista. Mekim nois nambaut long insait na ausait.

Bekim bilong em i go olsem: Sori. Yu save, nau kantri i senis. Long olgeta hap i gat trabel olsem. Yu traim olsem: Sapos yupela i gat sios lida, o prea lida o katekis; Ol i ken was long lotu. Ol i hambak, orait

rausim ol i go ausait. Sapos ol i laik kirapim trabel, orait givim ol long viles mejistret i skulim ol. Bambang ol i kamap gutpela man gen. Em tasol.

I tru, brata. I gat liklik senis bilong lotu. Tasol i no tumas. We bilong Misa, em i stap olsem bipo yet. Ol i senisim tok ples tasol. Sapos ol i holim yet tok Latin, bai ol pipel i no inap klia long mining bilong tok. Oltaim ol i sindaun nating long misa.

Na tok long senisim lotu, em i no asua bilong ol misineri. Olsem nogat! Em i wok bilong ol hetman bilong sios: Pop wantaim ol bisop. Ol i helpman bilong ol aposel. Ol i bos bilong eklesia. I no misineri.

Na em toktok bilong senis. Yumi tu yumi save senisim sampela samting tu. Senisim olupela haus, o ka, o siot, trausis, sket, klos. Em kain olsem. Lotu tu olsem. Tasol misa i no inap senis.

Emmanuel Wogeo,
Wewak.

SALIM OL
PAS I KAM
LONG:

WANTOK
BOX 1982
BOROKO

Dia Edita - Mi laik autim wari bilong mi.

1. Wanem sapos mi kristen pinis na bihain mi stap ausait na mi no go kisim komunio inap long wanpela yia o 2-pela yia. Na bihain mi go bek long banis bilong kristen. Na wanem? God bai belhat long mi o nogat? Plis mi laik bai yupela i bekim askim bilong mi.

2. Wanem mi no kristen na long bel bilong mi, mi save bilip long God. Na dispela bilip bai God i lukim mi o nogat? Na God i save mi haidenman tasol long bel bilong mi. Mi save bilip long God.

Olsem mi no klia na mi askim dispela. Sapos wanem man o meri i klia long dispela, plis bekim askim bilong mi.

So, em tasol.

Göwin Mangum,
Angoram/I.S.P.

Dia Edita - Nau mi laik bekim pas bilong Gowin Mangum bilong Sios ov Krai.

Yes Mangum, yu harim! God i no Papa bilong kros na belhat. Nogat tru. Papa bilong karim yumi i gat kros, na belhat. Tasol God Papa i no gat tru! God Papa oltaim i stap hepi tasol. Em oltaim i wet long pikinini i lus pinis i kam bek gen. Em bai i hepi moa long dispela pikinini i kam bek pinis.

Yu ken kisim Baibel bilong yu na yu rit long Luk Sapta 15, lain 1. i go inap long 32. Em i gat tupela tok bokis i stap. Em bai i soim yu God i gutpela papa olsem wanem. Em i wet tasol long pikinini i lus pinis i mas i kam bek. God Papa i laik hepi wantaim em. Nating em tasol liklik bekim bilong yu, Mangum. God bles yu.

Namba tu pas bilong yu. Yu tok olsem: Sapos mi no kristen, na long bel bilong mi, mi save bilip long God. Na mi haiden. Bai God i lukim mi o nogat?

Yes, Mangum, gutpela askim bilong yu. Yes Mangum. Maski kristen na maski haiden. Olgeta man i gat bilip. Yu ting long ol tum-buna na papa bilong mipela ol i winim bilip tru long mipela. Tasol bilip bilong ol i go nambaut long ol samting nambaut. Ol i no save, long trupela God olsem nau long mipela. Mipela nau mipela i save tru long God i mekim kamap heven na graun na yumi ol man. Yumi nau yumi save tru long trupela God Papa nau. Bikos la kristen i karamapim pinis Papua Niugini long Nem bilong Jisas na God Papa. Yu yet yu save tru long God nau. Yu no ken bilip tasol. Yu go na mek-

im sampela wok bilong laik bilong em tu na onarim tu long Em long bilip bilong yu.

Em tasol bekim bilong namba tu pas bilong yu. Tenkyu!

Otto Kovingre,
Wewak.



WOKIM HUL LONG MANI

Dia Edita - Mi save lukim planti ol meri long nambis na hailans i save wokim hul long kain kain toea olsem 20t, 10t, 5t, 2t, na 1t. Na ol i save hangamapim long ol rabis bilum bilong ol. Na ol i save karim wokabaut long ai bilong kain kain man long arapela kantri na PNG tu.

Dispela ol koin em i no bilong yu tasol na yu mekim olsem. Nogat. Em bilong olgeta manmeri long PNG. Sapos yu husat meri i bin mekim dispela kain pasin na yu mas sem tru na yu no ken mekim moa. Yu mekim pasin nogut long ol man long ples na long ol man bilong ovasis tu.

Sapos yu wanpela man o meri yu save long wokim mani, orait yu mekim dispela kain pasin. Nogat, orait yu mas sem tru na lusim olgeta. Em i no kina sel na yu mekim olsem. Em bilong helpim kantri go het long wok.

Sapos yu husat man yu laik bekim dispela pas. Autim tasol i go long Wantok. Em tasol ol pren mi wet long ritim. Laka.

Fred P. Palone,
Minj/W.H.P.



Poto long raithan i soim 26 Sista bilong 7 daiosis na 10-pela lain i bin skol long Tangugo Pastoral Senta long Wewak inap long 3 wik long mun Mas. Planti bipo ol i tisa. Nau ol lokal sios lida na pipel i bin kam olgeta de na skulim ol Sista. Em nupela aidia. Na long haus sik long Wewak tu ol Sista i bin lainim planti samting taim ol i harim ol wari bilong ol sik-manmeri. Nau ol i save moa long sambai gut long ol lokal sios lida na helpim wok bilong ol i go het.



Tupela poto long lephan i soim ol meri Manus i sindaun wok long Bulihan Komyuniti Senta. Olgeta samting ol i save wokim hia, ol inap salim long maket.

Ol pipel bilong Bulihan viles yet i bin wokim dispela senta. Na em i save helpim ol yangpela na olupela pipel bilong 12 viles olgeta. Ol i save kam lainim ol samting olsem wok gaden na pasin bilong wokim ol samting bilong ol tumbuna. Ol i skul tu long rit na rait.

Sampela taim ol saveman bilong gavman na sampela lapun bilong ples i save kam long skulim ol, olsem hia ol meri i lain long wokim naispela purpur.



OL MAMA LUKAUT KUS I KILIM PLANTI PIKININI

Helt Dipatmen i wari bikos strongpela kus i bin kilim sampela pikinini long Westen Hailans. Nogut dispela kain sik i kalap i go long ol arapela hap.

Mama, sapos yu laikim tru pikinini bilong yu, mobeta yu kisim i go long haus sik o helt senta na et pos bai ol i givim sut long strongim pikinini. Sapos pikinini i no kisim dispela sut na dispela kus i painim em bai ol tu inap dai.

Dispela kus inap stap longtaim - inap tu mun samting.

Lukaut: sapos wanpela manki i kisim dispela kain strongpela kus, i tambu long go long skul. Dispela kain sik i save kalap i go long ol arapela pikinini na manki i stap klostu.



TOK SAVE LONG



TAIM BILONG NOMINESEN

1. Sapos inap nau yu bin sindaun i stap long wanpela ilektoret, tasol nau yu kirap go bek long dispela ilektoret we mama i bin karim yu, o long wanpela narapela ilektoret we yu bin stap inap long 5 yia insait long laip bilong yu, orait, **YU MAS PUTIM DAUN NEM BILONG YU LONG RAN LONG ILEKSEN, BIPO LONG 12 KLOK, BELO STRET, LONG MANDE, DE NAMBA 2 BILONG MUN ME 1977.**

2. Sapos yu laik putim daun nem bilong yu long ran long ileksen na givim long wanpela asisten ofisa bilong ileksen long ilektoret we yu laik ran long ileksen - o sapos yu laik givim nem bilong yu long ofisa bilong ileksen bilong narapela ilektoret, orait, **DISPELA PEPA BILONG YU I MAS KAMAP BIPO LONG 12 KLOK, BLEO STRET, LONG MANDE NAMBA TU DE BILONG MUN ME 1977.**

3. Sapos yu laik putim daun nem bilong yu long ran long ileksen insait long dispela ilektoret we yu bin sindaun i stap long dispela tupela yia i kamap inap nau sapos yu laik givim dispela nominesen long ofisa bilong ileksen bilong dispela ilektoret yet, orait, **DISPELA PEPA BILONG YU I MAS KAMAP BIPO LONG 12 KLOK, BELO STRET, LONG MANDE, NAMBA 9 DE BILONG MUN ME 1977.**

YU NO KEN WET

YU GO NAU HARIAP NA RAITIM DAUN NEM BILONG YU

MEKIM LONG MUN EPRIL YET

**J.S. Mileng,
Electoral Commissioner
P.O. Box 5348, Boroko.
15th April, 1977.**

32 kain pisin laik pinis

Papua New Guineans' own national weekly in Melanesian Pidgin.

Editorial Office:
 Box 1982
 Boroko,
 Papua New Guinea
 Phone: 25.2214
 Telex: WANTOK
 NE 22213


Branch Offices:
 Box 396
 Wewak
 Phone: 86.2488

Box 90
 Rabaul
 Phone: 92.1355

Box 111
 Wabag.


Australian Advertising Representative:
 Kevin Engel
 8 Duraba Pl.
 Caringbah (2229)
 Phone: 525.6263

Subscription rate:
 Annual: K8.00.



Takahe

Pisin long raithan em i Chatham Islands Black Robin




Long Nu Silan tu ol i gat trabel long 32 kain pisin bilong ol nau i laik pinis olgeta.

Kiwi, em i nesanel pisin bilong Nu Silan - i olsem kumul bilong ol - klostu i laik pinis nau.

Narapela pisin, ol i kolim takahe, em i wanpela kain pato i gat retpela maus na longpela retpela lek, em ol i no bin lukim inap 50 yia nau.

Pisin ol i kolim Chatham Islands robin, wanpela blak-pela pisin i stat long dai planti, taim ol pipel i kam na katim bus - em ples na haus bilong dispela pisin.


Gavman bilong Nu Silan i wok na givim mani nau long helpim ol pisin bai ol inap stap gut na karim pikinini. Long wanem ol dispela kain pisin i olsem bilas bilong bus na kantri.



Kiwi.

TOYOTA

WINIM OLGETA PMV LONG PNG



TOYOTA **EIA** **MOTORS LIMITED** **Burns Philp**
GROUP OF COMPANIES

ples hait bilong ol abus bilong bus



I gat planti pikinini na skulmanki i no bin lukim yet wanpela kapul olsem dispela long poto antap, taim em i stap long bus. Na i gat wan wan muruk long bus. Liklik taim bai i no gat sampela olgeta. Planti pipel i wari long dispela samting.



Mista Stephen Tago, Minista bilong bosim na lukaut long ol samting insait long bus na wara, em i bin makim wanpela hap bilong Saten Hailans olsem wanpela ples tambu we olkain abus, i ken hait na i no gat man i ken go insait kilim planti. Dispela hap graun i gat nem Siwi-Utame.


Samting olsem 15,000 pipel i save go insait long dispela hap bus, bikpela bilong em inap long 12,500 hekta. Na hia ol i save sutim ol muruk, kapul, palai na arapela abus.

Ol dispela lain Saten Hailans pipel i bin askim gavman long tambuim ol man long kam insait long dispela hap na sut long raifel o masket. Na tu ol i tambu long yusim ol liklik kalabus ain bilong pasim ol abus. Na tu i tambu long yusim tamiok ain long katim ol tri.


Ol pipel yet i wokim ol dispela kain lo bilong bosim dispela hap bus:

- (1) I tambu long yusim sotgan na banara na kalabus ain long dispela bus bilong pasim ol abus o pisin.
- (2) I tambu long ol dok i kam insait long dispela hap bus
- (3) I tambu long tekewe ol kiau bilong kain kain pisin na muruk, sapos man i painim. Em i mas larim ol i stap.
- (4) Ol papa bilong dispela graun tasol inap long go insait long dispela bus.

Mista Tago i hepi tru long lukim ol pipel yet i wari na i wokim ol dispela lo. Em i orait long ol na em bai putim long niuspepa bai olgeta man i ken lukim na bihainim.



SL 803



SPESEL TAIA
BILONG OL
STOUT
LANDCRUISER

TAIA BILONG
ROT I GAT
GRAUN


SAIT BILONG
EM I NO SAVE
BRUK HARIAP

GAT NAILON
INSAIT


NO KEN
PULAP
LONG GRAUN

LAE: Aircorps Rot, klostu long maket

MORESBY: Manahu na Gabaka Strit, Gordons




AIR NIUGINI 



Kumul bilong Air Niugini

i flai stret long HONG KONG

**olgeta Tunde
long 5.30 long
apinun na i
kam bek long
11 klok**



AIR NIUGINI 
THE NATIONAL AIRLINE OF PAPUA NEW GUINEA

PLISMAN MAS WOK OLSEM

Mista Pius Kerepia, komisina bilong ol plis, i bin kliaim tok long sampela wari ol pipel i gat long plis. Ol pipel i kirap nogut long tingting ol plisman i westim taim long kisim planti kain samting olsem nem na adres na kain kain askim.

Tasol Mista Kerepia i tok, ol dispela kain toksave i mas i stap long ol buk bilong ol plisman na ripot bilong ol.

Tasol Mista Kerepia i tok, ol plisman i stap long was long san o long nait, i mas askim namba wan: bilong wanem man/meri i ring. Bihain, em i ken kisim ol nem samting. Nogut em i wet, na taim i lus na em i kamap bihaintaim tumas long helpim man/meri i ring.

Mista Kerepia i tok tu em as tingting bilong ol plisman bilong mekim wok olsem. Maski plisman i stap long yunifom o ausait long en, em i mas redi long helpim olgeta kain man. Plisman i mas helpim olgeta manmeri i kam askim em long helpim, o i ring long telipon. Maski dispela i man o meri, maski skin bilong em i wanem kala, maski em i bilong wanem lotu, maski em i maniman o rabisman, maski em i taunman o man bilong bus, maski em i saveman o longlong, maski em i strongpela man o man i bun nating o i gat sik o i wok long dai. Olgeta dispela man, plisman i mas helpim. Long tingting na aidia bilong plisman: olgeta manmeri i bikpela samting. Na plisman i gat wok long helpim em na sindaun bilong em.

TERRITORY NET SUPPLIES
NAMBA WAN PLES BILONG BAIM OLKAIN UMBEN
 importers fishing nets
 net tailors ropes, twines
 retailers leads, floats
 wholesalers needles
 Retail Store Factory P.O. Box 5860 Ph.25.6700
 Pascall Ave., Badili Boroko Port Moresby



Pius Binnwei Kerepia, O.B.E., C.O.P.

PNG BAIM RAIS LONG SOLOMONS

Long 11 Mas em i namba wan taim PNG i bin baim rais long Solomon Ailan. Wapela sip i bin bringim 50 tan rais i kam long Kieta. Na Lae Rais Indastri i bin kisim tu wapela sip i karim 200 tan rais i kam.

rais long Solomons. Tasol ol i ting long go long ssampela arapela pasis tu.

Inap nau PNG i baim rais oltaim long Australia tasol. Em i namba wan taim nau mipela i bin baim long narapela kantri.

Dispela rais i kam long wanpela koprativ bilong ol lokal pipel long Solomons.

Inap nau dispela tupela taun tasol i baim dispela

YUROP NO

TAKISIM

P.N.G.

Stat long namba wan de bilong Me, Papua Niugini i ken salim ol kopra na kakao na kopa na kopi long Yurop na i no gat takis long en. Em i min yumi winim planti mani moa.

Bikpela grup kantri bilong Yurop i orait long mekim olsem bilong helpim ol nupela kantri long Afrika na Pasifik olsem mipela.

Hetman bilong dispela grup, Mista Claude Cheysson, i tok ol arapela kantri i gat gutpela bilip long PNG na strong bilong mani bilong em. Em i ting tu, bai ol beng bilong Yurop i laik givim dinau mani long kain kain bisnis insait long PNG.

Nau gavman insait long PNG i yusim sampela dispela dinau mani long wokim gutpela lain telipon i go long olgeta hap bilong PNG. Nau tasol ol i bin pinisim gutpela wok telipon i go long Wabag.



NAMASU
 P.O. Box 615
 LAE
 Ring: 42.4200
 Kampani bilong yumi

NAMBAWAN TIN PIS

Kalsa Senta long Lae

Morobe Provins Kalsa Stua i wok nau long salim olkain kaving na samting olsem long olgeta turis. Misis Evarne Coote i wok long laik bilong em yet long ranim dispela stua.

Ol i salim tok pinis long olgeta viles nabaut long Morobe Provins long salim olgeta kaving bilong ol long dispela stua tasol. Long mun Desemba inap nau dispela stua i bin winim profitmani inap K250 long ol dispela kaving.

Dispela liklik stua em i olsem stat bilong winim mani bilong wokim bikpela kalsa senta bilong Morobe Provins. Ol i ting bai dispela bikpela senta i kostim inap long K90,000.

NUPELA AIDIA BILONG SALIM KOPI

Long wanpela bikpela miting long Lae 50 fama i save groim kopi i sindaun toktok wantaim tokman bilong gavman, na kopi indastri bot, na olgeta bikpela kampani i save salim kopi i go long ol ausait kantri. Ol kopi fama i strong long dispela samting: ol yet i laik salim kopi bilong ol - na i no laik putim long han bilong sampela arapela kampani. Olsem na ol i laik putim sea insait long wanpela nupeja kampani bilong ol yet. Nem bilong dispela nupela kampani: Cofex Pty.Ltd. Ol inap long putim moa olsem K700,000 insait long dispela kampani.

Siaman bilong dispela miting em Mista Barry Holloway, spika bilong palamen.

Sapos ol fama yet i bosim kampani, ol i pilim bai ol i kisim moa winmani. Ol tu i pret long gavman bai i insait long dispela kain wok long salim kopi long ol ausait kantri, na bai em yet i kisim bikpela profitmani.

Tasol Praim Minista Michael Somare i tok save long ol olsem: gavman i no gat tingting long kam insait long bosim ol dispela kain bisnis bilong kakao na kopi na kopra. Mista Somare i tok, gavman i laik bai ol pipel, ol fama yet i wari long dispela samting, olsem ol i bin mekim long dispela miting.

Planti lo kamap olsem

Bipo wanpela man i stap, nem bilong em Raringi. Dispela man em i harim sampela man i tok long bun bilong papa bilong em i stap long ol sampela lain manmeri. Na em i tingting long i go toktok wantaim ol, na ol inap long givim bek.

Na Raringi i go traim long toktok wantaim ol dispela lain manmeri. Tasol ol i tok, "Mipela i no save." Na em i go long ol arapela lain tasol ol i tok, "Mipela i no save long bun." Na em i go long ol narapela lain gen na i askim ol long bun. Ol tu i tok, "Nogat."

Na em i go long ol arapela lain na tokim ol olsem: "Bun bilong papa bilong Kampani Raringi em i stap wantaim yupela, o?" Ol i tok, "I no gat wanpela bun hia. Yu go long ol lain Ramui na askim ol. Ol i gat 3-pela bun i stap long dispela ol lain. Mipela i save harim tok win tasol."

Olsem na Raringi i go toktok wantaim ol dispela lain Ramui, na i toktok long bun bilong papa bilong em. Na ol i askim Raringi, "Wanem kain man? Em i longpela man o sotpela man?"

Raringi i tok, "Papa bilong mi i longpela man tru.

Tasol mi liklik yet na papa i dai. Na mi no lukim long ai bilong mi. Tasol sampela man o lain bilong mi ol i tok em i longpela man tru. Na mi painim dispela longpela bun."

Na ol i tok, "Yu lukim dispela bun. Em i longpela tru." Raringi em i tok, "Dispela bun em bilong papa. Mi laik kisim i go."

Na ol man i givim bun bilong papa, na em i kisim i kam bek gen long as ples bilong em. Na ol famili bilong Raringi wantaim lain bilong em i amamas long em i bin painim pinis bun bilong papa bilong em.

Nau tumora long en Kampani Raringi i bungim ol lain bilong em na i tok: "Nau yupela i bihainim maus bilong mi tasol na mekim wok. Long wanem: nau mi painim pinis bun bilong papa." Nau ol i bihainim maus bilong Kampani Raringi tasol.

Nau Raringi i tok long mekim bikipela pati long pik tasol. Na ol i bihainim maus na mekim bikipela pati long pik.

Na em i tok, "Nau taim bilong bikipela bung i go inap long wan wik" na ol i bihainim. Na em i tok long i go long olgeta ples na painim sol bilong ol yet,


na ol i mekim dispela wok. Na em i tok long painim gras pisin long bus, na ol i bihainim na painim gras pisin long bus.

Na em i tok long nait ol i kaikai na mekim pilai i go na ol i bihainim. Na em i tok long holim han bilong ol na raunim haus na ol i mekim inap 8-pela taim, na ol i mekim olsem. Na em yet i sanap namel long ol.

Na em i tok, "Nau yupela olgeta i kam slij long bikipela haus bilong mi na mekim kain kain stori." Na ol i bihainim. Na em i tok, "Nau yupela i ken wokim bikipela ples pilai bilong lainim kina na pik." Na ol i bihainim na wokim.

Na em i tok long ol hetman tasol i kam long haus bilong em na kisim skul. Na ol i bihainim maus na i kam. Na em i tok, "Nau yupela i go pait wantaim ol lain birua." Na ol i bihainim maus na ol i go.

Na em i tok, "Yupela wokim bikipela baret i go, i go kamap long wanpela bikipela wara, na kisim dispela wara i kam na dispela wara i ken ran arere klostu long haus bilong mi." Na ol i bihainim maus na wokim bikipela baret i go, i go kamap long wanpela bik-



pela wara nau i ran klostu long haus bilong em. Na Raringi i givim nem long dispela wara. Em i olsem "Nukumbukum" mining bilong em i olsem: "Lain pipel bilong mi."

pipel bilong mi."

Na Kampani Raringi i gat wanpela pikinini man tasol i stap. Nem bilong em Anda. Mining bilong nem i olsem "Mi lapun pinis na mi karim."

Na Kampani Raringi em i lapun pinis na taim bilong i dai klostu, na em i givim blesing bilong mekim wok i pinis, na em i


tok, "Yu ken kisim ples bilong mi na mekim wok i stap na bihainim rul bilong mi, na ol i ken bihainim maus bilong yu."

Na em i skruim tok olsem: "Na mi i dai, orait yu planim mi wantaim bun bilong papa long matmat. Antap long en yu planim diwai kwila. Em i strongpela diwai. As bilong planim diwai antap i olsem: I makim mi strongpela man." Na pikinini Anda i bihainim tok bilong papa na mekim olsem.

Pikinini Anda em i kisim ples bilong papa na mekim (i go moa long pes 17)



Ol i Wokim
Strong
Moa



i Save
Ran
Longtaim

STEAMSHIPS MACHINERY
NA OL STUA I SALIM HONDA



bilong wanem

PANGU

**i narakain tru
long ol arapela pati ?**

PANGU i

- NAMBA WAN LONG KAMAP PATI TRU LONG PAPUA NIUGINI
- NAMBA WAN LONG KIRAPIM LO LONG GIVIM OL MERI WANKAIN PE OLSEM OL MAN LONG 1969
- SENISIM LO BILONG HUSAT I KEN VOT LONG YIA 21 I GO LONG YIA 18 LONG 1969
- NAMBA WAN PATI LONG SINGAUT LONG SELP GAVMAN TAIM SAMPELA PIPEL TRAIM GIAMANIM YUMI
- NAMBA WAN PATI LONG GO PAS LONG KIRAPIM GAVMAN TRU LONG 1971
- NAMBA WAN PATI LONG STRETIM PE BILONG OL WOKMAN NA OL WOKMERI
- NAMBA WAN LONG SINGAUT NA BRINGIM INDEPENDENS
- NAMBA WAN PATI LONG GIVIM PRAIM MINISTA LONG YUMI


SAPOS YU RITIM GUT OL TOKTOK ANTAP

BAI YU KEN SAVE TRU OLSEM

PANGU I NARAKAIN OLGETA.

LONG WANEM PANGU I SAVE GO PAS

**PANGU I
NAMBAWAN**



Wingkeo Williong, Nesenel Seketeri, Pantu Pati
P.O. Bokis 623, Port Moresby, i bin oraitim ol dispela tok.

PAS I KAM LONG OL PIPEL

OL APO LAIKIM MOA PE

Dia Edita - Yes brata Joe Topendik Musoram mi tu mi trahat moa long painim kain stori olsem. Nau mi yet mi painim nau na mi rait.

Mi save lukim ol et pos odeli ol i save hatwok moa long wok ya.

Long taun em i no gat tok long en. Tasol long et pos, ol i save hat moa long go kisim marasin na hatim wara na klinim baksait long haus sik na ol man bilong taun i kisim bikpela mani nating tasol.

Em tasol. Nogut mi rait nating i no stret.

Piren K.B.K.,
Arawa/Not Solomons.

BAIM HAUS SIK

Dia Edita - Hia nau mi laik bekim pas bilong brata ya, Mista Nick S. Avene bilong Mt. Hagen. Brata, yu tok long givim marasin fri long ol plisman na ol i no ken baim marasin wantaim haus sik.

Brata, mi amamas long tok bilong yu tasol mi no amamas bikpela tru long tingting bilong mi. Bilong wanem? Olgeta samting long bikpela stua, tret stua, maket na arapela samting i save kostim mani. Mipela i no save kisim ol samting fri long dispela samting. Olgeta samting mipela mas lusim mani na baim.

Long haus sik, brata mi tokim yu na yu harim gut. Ol liklik samting na bikpela samting i save kostim bikpela mani. Na ol dokta na sista ol i no save kisim marasin fri long arapela kantri long kisim i kam long haus sik olsem long Port Moresby, Lae, Madang, na long ol arapela bikpela haus sik. Samting mani tasol save wok. Brata, long wanpela tablet o kapsol i save kostim olsem K2 o K3 long wanpela tasol.

Olsem na ol manmeri long ples na wokmanmeri i

mas baim marasin na haus wik long kisim marasi. Maski long givim fri long ol na westim marasin. Brata sapos yu gat sik na i kam long I.L.H. long Mambisanda mi bai inap long kisim 2 toea o 3 toea. Olsem na olgeta manmeri mas baim haus sik na marasin.

Em tasol long bekim bilong yu brata, sapos yu belhat oke rait tasol i go long Wantok Niuspepa na bekim bilong mi gen.

Newson Wambe Epano,
Mambisanda/Enga.

DROIM MANI LONG LAPLAP

Dia Edita - Hia mi laik autim wari bilong mi long mi save lukim ol i save putim piksa bilong K10. K5. na K1. na putim long ol laplap em i no stret tumas long ai bilong mi.

Mani em bikpela samting tru bilong yumi ol Papua Niugini. Mani yet i save kirapim kantri bilong yumi. Ol kain wok em mani yet i save ranim insait long PNG. I no gutpela tumas long ol i save putim piksa bilong mani antap long ol laplap. Dispela kain i soim olsem i luk pani long kantri bilong yumi.

Ating ol i laik mekim pani tasol long mani bilong mipela na tu long kantri bilong yumi. Dispela pasin i no stret tumas long ai bilong mi.

Sapos yu husat brata o susa yu ting i no stret tumas long tingting bilong yu, orait, rait i go tasol bai mi ken lukim. Em tasol.

Moses Winka,
Nimbogu/Wewak.

TAKIS BILONG WANEM?

Dia Edita - Mi i gat liklik wari na nau mi laik autim. Ol kaunsil i save kisim takis long Goromauglo. Takis olsem K8.00, K9.00 i no stret. Bilong wanem yupela ol kaunsil i stilim mani bilong ol pipel nating tru?

Em olsem, bilong wanem yupela i no bin mekim wanpela wok long mipela? Wok olsem mekim rot i go bikpela na mekim bris bilong mipela i go bikpela. Orait yupela i mas i kam kisim takis long mipela olsem K8.00 o K9.00. Nogat, orait yu no ken i kam kisim. Yupela mas i kam kisim K3 long ol man, na 50 toea long ol meri. Em tasol inap.

Em tasol liklik wari bilong mi. Husat man i wari orait. Mi ken save olsem wanem ol i no bin helpim? Raitim pas i kam long Wantok Nius. Em tasol.

J.V. Martin,
Kundiawa.

ET POS PE DAUNBILO TUMAS

Dia Edita - Mi laik sapotim tok bilong wantok A.P.O. James Kirkimo bilong Yukilo-Et Pos.

Mi ting olsem bikpela wok bilong Helt Dipatmen. Em mipela A.P.O. i pos tru bilong mekim. Na sapos ol A.P.O. i no i stap, ol man i dai nambaut long ol ples husat bai inap long kirapim kantri bilong yumi go het?

Yupela saveman bilong taun tasol i kirapim kantri go het? Olsem na plis yupela bikman bilong gavman inap long apim pe bilong ol A.P.O. i go antap? I luk olsem namba

wan wok bilong kirapim kantri i go het em ol APO wok long ples nambaut long de na nait na long olgeta de.

Olsem na yupela bikman bilong gavman i ting wanem long pe bilong ol? Liklik pe em inap long famili bilong ol A.P.O.? Em tasol na sapos husat A.P.O. i gat tingting mas autim. Tenkyu tru long mi autim wari bilong mi.

John M. Yegupe,
Bena Bena/Goroka.



HUSAT INAP HELPIM DISPELA MAN

Dia Edita - Mi i gat liklik wari na mi laik askim yu. Wanpela pikinini bilong mi krismas bilong en 23, em i bin wok long P.W.D. long Maun Hagen na long yia 1974, em wantaim masta bilong en tupela i lusim Maun Hagen na tupela wag wantaim i go long Wewak.

Long yia 1974 mi bin lusim Bomana na i go long Wewak na mi ting bai mi inap long bungim em, tasol i no gat. Na mi wok long painim askim i go i go na i no gat tru. Na mi lusim. Orait na long yia 1975

na 76, mi i no bin kisim wanpela pas bilong en, olsem na mi wok long rait askim i go nambaut long olgeta provins na i no bekim i kam long mi, olsem na mi i gat bikpela wari na mi laik askim yu so yu inap long helpim mi?

Sapos yu laik long helpim mi, orait, plis yupela i prinim liklik tok save bilong mi wantaim adres bilong mi long Wantok Niuspepa.

Em tasol na mi tok bikpela tenkyu i go long yu.

Benjamin Yapson,
Wewak.

TOKSAVE

Mista Benjamin Yapson bilong Kinapulam Viles insait long Wabag, Enga Provins, i laik painim MISTA KYAKATAE LYAMBI bilong Yaingianda Viles insait long Wabag Enga Provins.

Sapos KYAKATAE LYAMBI yu stap long wanpela hap long PNG na ritim dispela toksave, orait famili bilong yu i gat bikpela wari long yu. So yu rait i kam long dispela adres.

Mista Benjamin Yapson,
P.O. Box 33,
Wewak. E.S.P.
Phone No. 86 5204
86 52 11

BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisin na salim i kam wantaim K8.00.

NEM BILONG YU:.....
ADRES BILONG YU:.....

Salim sek o mani oda inap long K8.00 wantaim dispela tiket i kam long:
WANTOK
BOX 1982
BOROKO

Sapos yu bilong wanpela skol o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel-prais mipela i gat long man i baim planti WANTOK olsem.

Dispela spes Yunaitet Pati i baim.



DISPELA POTO I SOIM SAMPELA BILONG OL 400 DELIGET I BIN KAM LONG
NESENEL KIBUNG BILONG YUNAITET PATI

OL DISPELA PIPEL I KAM LONG OL LIKLIK PLES NA OL I SAVE TUMAS LONG
OL WARI BILONG-OL VILES PIPEL

OL DISPELA PIPEL YET I RAITIM PLATFOM BILONG YUNAITET PATI

YUPELA OL VILES PIPEL
YUNAITET PATI I SAMBAI LONG YUPELA

YUPELA OL VILES PIPEL
YUPELA OL PIPEL BILONG PAPUA NIUGINI

YUPELA OL PIPEL BILONG PAPUA NIUGINI
YUPELA YET I GAT PAWA

YUPELA I GAT PAWA LONG VOT

YUPELA MAS SAPOTIM OL VILES PIPEL

YUPELA I MAS VOTIM OL YUNAITET PATI KENDIDET

YUNAITET PATI - PATI BILONG YUMI LONG PLES

Tok orait long dispela tok save i kam long
Sir Tei Abal, CBE., P.O. Box 3534, Port Moresby

STORI TUMBUNA

(i kam long pes 13)

toktok long lain bilong em. Em i tok long em i givim sampela lo bilong ol i bihainim. Sampela tok em i putim i olsem:

Long olgeta kaikai ol i mas mumuim long ston tasol na ol i kaikai. Tambu long kukim long paia. Olgeta pik ol i mas kukim long paia tasol na ol i kaikai. Tambu long mumuim long ston.

Na em i tok, "Yupela i karim pikinini man, orait kisim i kam long mi na mi mas givim nem long em. Na pikinini meri, orait yupela i ken bringim long meri bilong mi na em i mas kolim nem long em. Tambu long yupela yet i givim nem long ol pikinini bilong yupela."

Na em i tok long kamap bilong em. Em "Mama i karim mi aninit long bet bilong bikpela haus bilong papa. Na mi stap long susu bilong mama na kamap

bikpela liklik. Na mama i wok long givim banana mau tasol na mi kaikai i go na kamap bikpela. Na em i givim planti kumu long mi na mi kaikai. Na kaikai bilong mi mama i save givim mi i olsem: Kiau bilong pisin, retpela yam, taro, kukamba, bin, hap mit bilong pik, retpela kaukau.

Mi kaikai i kam, i kam na mi kamap bikpela olsem man pinis. Na mi marit long wanblut papa bilong mi. Na nau mi kisim ples bilong papa na mekim wok i stap."

Pinis, na em i tokim ol lain bilong em. "Yupela i go na kaunim olgeta diwai i sanap nabaut." Ol i go, tasol ol i no inap pinisim namba bilong diwai. Na em i salim ol i go long wara na kaunim olgeta ston bilong wara. Tasol ol i no inap pinisim namba bilong ol ston.

Na em i tok long ol i go kaunim namba bilong olgeta pisin long bus. Tasol ol i no inap pinisim namba bilong pisin. Na em i salim

ol long i go kaunim ol snek. Tasol ol i no inap pinisim namba bilong snek.

Nau em i tokim ol, "Yupela olgeta i kam na wokim wanpela bikpela haus bilong mi, na dispela haus i mas gat 7-pela dua. Pinis, orait, yupela i ken katim 7-pela bikpela diwai, na sapim i kamap pos bilong mi, na sanapim 7-pela pos bilong mi klostu long 7-pela dua long haus bilong mi." Na ol i bihainim maus bilong Anda na mekim olsem.

Na Anda em i kisim ples bilong Papa Raringi na mekim toktok wantaim ol lain bilong em i kam inap long em i painim lapun bilong em na em i dai pinis.

Na i no gat wanpela pikinini man bilong em. Olsem na 3-pela pikinini meri bilong em ol i kisim em i go na planim em klostu long papa long matmat.

Na ol i mekim toktok long ol lain manmeri long dispela i pinis olgeta, na ol



birua i kam bagarapim dispela ples, na i pinis. I no gat manmeri moa. Ples nating i stap.

Timoti Wangdui,
Rintebe/Goroka.

Poto antap i kam long Difens Fos na i soim liklik boi, Bill Taura, taim em i go long skul namba wan taim.

WINIM MANI ISI TUMAS

PAINIM NA KISIM OLPELA TAIA I KAM MIPELA DUNLOP I SAVE BAIM

LAE: Aircorps Rot - klostu long maket

THE INVESTMENT CORPORATION OF PAPUA NEW GUINEA

Long poto antap yu lukim wanpela wokman bilong Invesmen Koporesen, Itona Javati, i wok long toktok wantaim tupela man bilong Isten Hailans Provins, Harry Gotaha n a Awo Ketawa, em tupela i laik save moa long pasin na wok bilong Invesmen Koporesen.

BAIM SEA LONG INVESMEN KOPORESEN
BILONG PAPUA NIUGINI


na bai yu kisim winmani bilong wanpela bikpela bikpela kampani tru

Sapos yu laik save moa long we bilong kisim winmani, yu rait long: Investment Corporation
P.O. Box 155
Port Moresby


NEM BILONG YU:

ADRES BILONG YU:

.....



Poto long raithan i soim tupela Is Sepik man i stap insait long wanpela bikpela haus telipon long Brisbane, Australia. Namba wan man long lephan em Mista Kaspar Daun, bilong ples Torembi. Na namba tu man em Mista Mark Yapali, bilong Wombun long Chambri Leks. Tupela i wok long lukluk long trenu bilong tupela long fran em Mista Glen Landells, i soim we bilong subim waia i go insait long ples bilong em stret. Tupela i studen bilong Yuni-versiti bilong Teknoloji long Lae.




Long poto daunbilong Koprul Francis Loksi bilong Nu Ailan i soim medal bilong em long tupela soldia meri i wanklas bilong em. Koprul Loksi i bin kisim ol namba antap tru long ekseminesen long skul wailes bilong ami long Australia. Koprul Loksi i save wok long Port Moresby.



PIKININI MAS KISIM SUT.

I gat 6-pela kain sik i save painim ol pikinini. Ol dokta na nes i tok save long dispela wari long ol mama. Ol i tok 'OL PIKININI MAS KISIM SUT.' Dispela smatpela mama i harim tok na kisim pikinini i kam long kisim sut. Ol meri long baksait bilong mi i karai long pikinini i dai pinis. Pikinini i dai bikos em i no kisim sut. Sapos pikinini bilong yu i no kisim sut, yu kisim em i

go long dokta o nes
KWIKTAIM tru.



Mi amamas long pikinini bilong mi i kisim sut. Nau em bai i no ken i dai. Tenkyu dokta Poroman.

BILISO .O.